

摘藻堂四庫全書薈要

集部

欽定四庫全書薈要

集部
元詩選初集卷三十一

詳校官候選知縣臣吳甸華



欽定四庫全書薈要卷二萬三百九十一

集部

元詩選初集卷三十一 長洲 顧嗣立 編

黃縉日損齋集



縉字晉卿婺州義烏人生而俊異學為文頃刻數
百言弱冠西游錢塘得見遺老鉅工宿學益聞近
世文獻之詳還從隱者方韶父游為歌詩相唱和
絕無仕進意延祐開科登進士授寧海丞至順初
以馬祖常薦入應奉翰林文字轉國子博士出提

舉浙江等處儒學亟請侍親歸俄以祕書少監致仕至正七年起翰林直學士知制誥同修國史擢兼經筵官陞侍講學士同知經筵事累章乞休不俟報而行遣使追及十年夏得請還南七歲而卒年八十一贈江西行省參知政事追封江夏郡公謚文獻所著有日損齋藁三十三卷筆記一卷宋景濂曰先生素行挺立貴而能貧遇佳山水則觴咏其間終日忘去雅善真草書為文布置謹嚴援

據精切俯仰雍容不大聲色譬之澄湖不波一碧
萬頃魚鼈蛟龍潛伏不動而淵然之色自不可犯
世之議者謂先生為人高介類陳履常文辭溫醇
類歐陽永叔筆札俊逸類薛嗣通歷事五朝巖然
以斯文之重為己任與臨川虞集豫章揭傒斯同
郡柳貫齊名號儒林四傑合而觀之待制之才雄
肆而侍講之思峻潔一時才士如王禕宋濂輩並
出黃柳之門而滙為一代文章之盛殆亦氣運使

然者矣

效古五首

上山見明月下山月相隨月豈知愛我我行自見之故
山日以遠故人不可思殷勤謝明月願爾無時虧

女美衆所悅士窮世所輕輕重安足言泥盡水自清淮
陰初寄食曲腰胯下行季子黃金多妻嫂來相迎自古
已復然歎息空吞聲

擊石乃有火石火光不揚攀天亦有路天高路何長嵯

峨萬古雲下覆歌哭場富貴誠足多貧賤不可忘
落花隨風吹各自東西飛花飛既不息水流復無極同
生不同歸能勿異顏色木生則有枝豹死則有皮悠悠
岐路間多言亦奚為

飲酒莫盡醉盡醉無餘歡讀書莫弔古弔古多悲酸蕭
艾蔽中野白露摧芳蘭鳳飢不得死鴟梟食琅玕去去
復去去采芝青雲端

晚晴

洩雲散積雨林水含餘清披衣有奇懷偶從林叟行新
晴遠峰麗夕陰孤花明曠日固所虞聊茲息營營

夜歸

空山四寥寥落日翳榛楚蜿蜒草中徑躡屩度寒雨楠
杉窈深黑忽忽疑休虎林窮澗水明稍聽歸人語

陪諸老夜飲

世故不可料忽若浮雲移坐令百年內顛倒殊歡悲顧
惟我與公異代同一時覽古既深慨撫今亦餘噫長川

去悠悠青山莫委蛇向來遠遊意我行方遲遲咄哉有志士卒歲恒寒飢况復託渺茫欲與千載期盈虛信天運廢興豈人為願公姑舍是一觴聊可持

讀忠簡宗公遺事

公初起滏陽艱危屬多壘蒼然國家意委身干戈裏陰飈捲翠華朔雪披南紀悠悠虞淵日力盡揮不止寅恭秉齋鉞際會開朱邸長安付馮異漢業中興始宮庭數汎掃蹕路無荆杞疚心望鑾輿感激涕如水上表方出

師嗚呼孔明死宴安不可懷肉食母乃鄙巨舟竟未焚
三語猶在耳蕭然舊祠下碧草垂堦祀登堂挹光儀赤
舄仍几几千載墮淚碑一夫敢殘毀傳家有遺書敘事
非虛美勗哉慎失墜庶以裨信史

西峴峰

層雲抱春岑急瀨洩嵌竇脩蹊入窈窕衆綠蔚以茂名
亭標水樂柱折荒碑仆幽尋得緇廬亂石扶結構青精
午堪飯碧澗寒可漱平生慕真賞及此成邂逅冥探指

絕頂有路忽通透緣蘿度蒙密翠氣溼衣袖寄身沈寥
內下睨人寰陋清謳雜風竹大嘯落巖狖東峰在眉睫
可望不可就同遊却何時瑤草春已秀

夜興

秋氣入病骨殘夢脩然驚芭蕉葉間露風過皆成聲攬
衣沈寥內搔首天河橫飢蟲語不休中宵誰汝令孤鴻
亦何苦犯霜度微明悠悠念羣動百感忽我并大化儻
不爾吾其免營營

陳生詩

陳生少也孤秉志何軒軒讀書奉慈母承顏郁春溫兀
然處膝下不間晨與昏叢叢萬井中陳生深閉門暉暉
百花時陳生不窺園常恐去左右或乖覆育恩一朝抱
長痛飛霜隕秋萱鹽酪不入口日夜涕傾盆欲娶弗及
養矢言終不婚尚賴百歲後兄子父所孫朝來遊子衣
忽逐東風翻世方醉糟粕何庸薦犧尊陳生顧謂我是
事安足論幸託山水窟放情詠蘭蓀嗟今學步者觸險

爭飛奔願爾利鋤鏹深斲六籍根願爾進竿櫓高湔百
聖源源長流自遠根大枝乃蕃勿搖崔嵬筆誇作礪硯
言弘惟孝與弟百行茲其元咄哉行勿休日月方云云
贈言豈予敢情真覺辭繁匪為陳生榮庶感薄俗敦

送凌吉叟之杭州教授

浙水西八州維杭實名都古來萬人海逐逐無賢愚以
茲百年後淳樸古不如翩翩誰家兒白馬驕路隅春風
樊樓醉一笑百斛珠亦有朱門家齊謳間吳歆綃綺散

煙霧繽紛被僮奴可憐彼蚩蚩久為紅塵驅頽俗如波
瀾孰障羣流趨又如敗屋壁風雨須人扶博士非冗官
豈即無良圖當令歌舞場化作絃誦區行矣循所務辭
章信其餘春風摻別衣晴沙秀寒蘆何以贈子行白雲
不可呼聊持狂者言用比貂襜褕

晚泊釣臺下

四山環一水遺臺故巘岼那無漁樵居政復不敢安舍
舟衝微雨憑軒俯清灣念昔乘興來無從寄游觀今我

有行役乃爾容躋攀山靈豈愛我為解塵土顏落日奠
蘋藻清風聞珮環幽尋不可極林暝吾當還却去望層
碧孤舟生晚寒

重登雲黃山

茲山實靈奇吐納變舒慘太常闕弗錄名號何黦黥重
華秩山川盛典軼封碣蒐遺多綸綍蠲潔羅醢醢腐儒
世所貸薄藝守鉛槧無能旅駿奔徒取肆游覽霖潦時
始收天地餘藹晦嵐光乍璘璫石狀終黠黠行行恣芒

屨往往得鼃坎冒進誠近貪自畫將豈敢久之零埃豁
秀色坐可攬青熒插鋒鏑翕赭披菡萏崖奔馬駢駢石
踞虎眈眈高尋指天路幽矚極玄窞前行幾台背後或
兩髦髧緣岡既蹉跎登嶺仍輜輳舉頭塔廟湧地平忽
如毯天人所食息瓊玖化餘糝林輝寶燈燒風語金鐸
撼敗壁詩者誰漬墨亂濃淡險盡乃復佳疲極復何憾
是節蕤賓初野薦首昌歎煮瀑茶可啜剖石蜜堪噉名
談析毫髮苦語瀝肝膽理冥心自珍機湊首屢鎮陽烏

書西者翦衆色齊慘澹崔嵬識梗楠蒼莽辨葭莢莫投僧
所寰鐘鏗鼓紉紉羣居肅不吳共飯聲有噉迴睨夸奪
場撫事叢百感趨名蛾赴燭逐利魚投摻何時脫火宅
霍若髭去頷綺言息誦誦妙供紛醺醺於焉寄相羊庶
以忘坎壈誰云入道苦餘味需橄欖

秋夜觀書作

閒居感時駛獨學難為功眷言思古人幽懷極忡忡秉
燭起中夜攬卷來清風恭惟千載心皎潔懸無窮氓俗

自升降道妙非汙隆後來亦奚為黑白紛相攻華芳乍
可悅軌轍何由通吾將離言說庶以觀其同所憂明為
累不懼蓄不豐開軒視明河白月當天中怡然掩書坐
夜氣方鴻濛

覽元次山春陵行有感近事追和其韻以寓鄙
懷

惟王始建官民命有所司奈何閱流殍束手無一施屬
者秋夏交上狀殊酸悲赤日紛按行人馬同時疲連阡

見標榜不救飢與羸仍聞恣鞭笞慘怛傷膚皮檢覈須
再三供張常恐遲哀哀鬻兒女貿貿行安之感茲欲無
訴既往何由追尚慚噢咻恩稍緩租稅期云胡有倉卒
徵斂更相隨但將充其數肯復計爾貲肉食不自鄙謂
我非敢知棲棲甌石儲剝割無或遺言是鄰壤凶藉此
敷恩慈寧知是州人俟死無他為出語餘喘息行步須
扶持猶令比樂土疾苦喘謂誰俛首州縣間逋責自其
宜况迫大府令聯絡飛符移豺狼方在郊鷹隼宜用時

區區獮狐兔政爾何增虧吾賤不及議為君陳苦辭

石臺分韻得下字

蒼山面長溪勢若飲奔馬層臺跨其脊萬古挹瀟灑登
臨茲惟要朋從未云寡迢迢歷榛莽靡靡眺原野白雲
與翠霧負在履屐下窮秋向搖落霜菊政堪把賞心孰
無同幽抱欣已寫邈矣千載期銘山俟來者

遊西山同項可立宿靈隱西菴

薄遊厭人境振策窮幽躅理公所開鑿遺跡在巖麓秋

杪霜葉丹石面寒泉淥仰窺條上猿攀蘿去相逐物情
一何適人事有羈束却過猊峰迴遙望松林曲前山夜
來雨溼雲漲崖谷縹緲辨朱甍禪房帶脩竹故人丹丘
彥抱被能同宿名篇聊一詠異書欣共讀蹉跎未聞道
黽勉尚干祿夙有丘壑期吾居幾時卜

陳孝子詩

南仲杭陳氏斗龍父所名家臨百丈溪父書傳考亭夫
亦人之子胡獨以孝稱維仲適母盛王實生寧馨盛謂

我已出無殊祝螟蛉仲父諱弗言王卒不自明睠然舍
之去呱呱聞泣聲年運日已往頭角稍崢嶸籲天乞隕
滅願以益父齡父沒盛亦亡弔影傷孤煢或乃告之故
曰汝王所生王居清湖上去此無十程時仲新捧檄精
廬擬橫經悲號棄其官肩輿親奉迎安知世代易人非
餘故城鄰有鶴髮嫗叩之久始應言我與汝母少小俱
娉婷汝母生汝歸去作江東行不知今在無我老猶零
仃仲也聞益悲羸糧事晨征六年困逆旅冷雨啼青燈

譬彼無母雛投林輒哀鳴永豐有施氏大屋深重局於
焉得母處一夕相合并母子更抱持淚如九河傾三日
負母還盜賊方搶攘倉黃與之遇白刃紛交橫頓首前
致辭覲縷陳衷誠能令激高義相戒勿敢驚仲昔以至
行上天降休禎靈鴈既羣集嘉瓜復冬榮區區彼蟲蟲
豈遂無人情聖人語純孝厥有閔與曾未聞樹奇節謠
頌傳轟轟此道古或希此事今可徵我歌雖云俚庶感
蚩蚩氓

上京道中雜詩 錄八

發大都

辭親獨行邁遙遙抵京國胡為突不黔驅馬更遠適至
尊有時巡樹羽殷阡陌宿衛必近臣顧問須耆德陋儒
亦何知冗從同執戟草深原野青雨暗關塞黑寥寥盛
年意眷眷遊子色一身萬人中敢不思努力

居庸關

連山東北趨中斷忽如鑿萬古爭一門天險不可薄聖

人大無外善閉非捷鑰車行已方軌關吏徒擊柝居民
動成市廬井互聯絡幽龕白雲聚石磴清泉落地雖臨
要衝俗乃近淳樸政須記桃源不必銘劒閣僕夫跼謂
我無為久淹泊山川豈不好但恐風雨惡

槍竿嶺

憶昔賜第歸吾母適初度蹉跎歲月晚今辰乃中路居
人誇具慶遊子慚叱馭茲山稱最高揚鞭入煙霧矗矗
多峭峰濛濛饒雜樹崎嶇共攀援躑躅頻返顧陳情未

成表登高詎能賦獨憐山水遠向廬溝去

李老谷

緣崖一徑微入谷雙崦窄密林日易昏況乃雲雨積行人望烟火客舍依山色家僮為張燈野老煩避席未覺風俗殊祗驚關河隔嚴程不可緩子規勿勸客

赤城

雞鳴秣吾馬晚飯山中行何以慰旅懷赤城有嘉名灘長石齒齒樹細風泠泠時見巖壁間粲若丹砂明溫泉

發其陽撫訶勤百靈前峰指金閣真境標殊庭白道人
跡稀青厓雲氣生信美無少留緬焉起深情

獨石

解鞍及亭午稍欣煙霧收蒼然衆山出歷歷如雕鏤前
瞻一石獨靈宮居上頭頗聞去年夏水激龍騰湫走避
登屋山夜半齊呀咻幸茲溪澗中今作清淺流宴安不
可懷變化誠難求翠華渺在望行矣毋淹留

擔子窪

自從始出關數日走崖谷迢迢度偏嶺險盡得平陸陂
陀皆土山高下紛起伏連天暗豐草不復見林木行人
煙際來牛羊雨中牧颯然衣裳單咫尺異寒燠佇立方
有懷相逢仍問俗畏途宜疾驅更傍灤河宿

上都分院

晨興過桓州旭日生蒼涼舉頭見觚稜金碧何巍煌洪
河貫其前青山環四傍莫投玉堂署鰲峰屹中央升階
旅羣彥官燭分餘光琴冊森在側談笑來清觴列坐無

所為陳詩詠黃唐帝鄉豈不樂父母遠莫將起視雲漢
低垂星爛寒芒南飛有冥鴻邈矣天際翔右紀行詩本
十二首虞伯
生題其後云少陵入蜀路崎嶇故有淒涼五
字詩應奉為官隨翠輦固應同調不同辭

同王章甫待制校文上京八月十五夜宿龍門

驛

涼風墮黃榆萬馬皆南馳而我方北首度關及鳴雞石
路更幽阻僕夫慘不怡徐驅待明發決泝窮烟霏貂裘
者誰子怪我逢掖衣為言霜露多遑遑獨安之我非不

自愛簡書今有期憶昔州縣間折腰向小兒荏苒二十
年白首初登畿同袍如燕鴻去住恒相違悠然慨平生
與世何參差暝投龍門驛高館臨迴溪青崖拱白月水
木含餘輝秋色故瀟灑我行殊未遲相從況魁彥炯若
珊瑚枝衰莫奚足云一觴聊共持

送王鍊師歸四明

飄飄采真侶乃在四明山霞居朝帝所瓊館留人間忽
聞雙鳬舄却向東南還望之若流星邈然不可攀海月

照階祀天風飛珮環我何苦羈旅冰雪生朱顏

湖上即事

垂雲晝濛濛湖面惟一色薄暮風更生際夜雪初積凝
陰勢方盛塵鏡喧暫息坐久聞拏音忽然破寥闕

題清華亭

名區滙脩渚流望俯平陸飛雨天際來遠峰淨如沐生
香餘晚華繁陰藹嘉木秀色坐可攬終然不盈掬觸景
幽興多接物道機熟誰能與之遊食芳飲山淥

曉行湖上

曉行重湖上旭日青林半
霧露寒未除鳬鷺靜初散
緣際餘景閃倏多遺玩會心乍有得撫已還成歎
夙予丹霞約久茲芳洲畔
獨往願易違離居歲方換
沙暄芷芽動春遠川華亂
存期乃寂莫取適豈爛漫
小隱儻見招漁樵共昏旦

登錢山望菰城慨然而賦

吳興水為州諸山若浮萍
況此一培塿瑣屑世未名
所

欣漁樵居乃與緇錫并種竹有萬竿結茅無十楹老僧
解人意蹤履能相迎芳草被行徑朱藤暗巖扃蕭條空
階莫日照莓苔青猶嫌所歷卑未極游眺情聳身白雲
上始見春申城想當高會時樓觀飛青冥竭海薦壘勺
窮山羞鼎鑊安知千載後寂莫無人行煌煌冠蓋區壤
壤狐兔塋歸來朱門客聽此松風聲

雪竇紀遊四首

高人欣相迎山門帶流水風生珠樹間月窺鏡池裏觸

景遂成迷應接殊未已

幽尋指山椒崖傾忽如瀉俯身視木末懸水在足下冥
冥巖岫中宴坐奚為者

詰旦逾西岡草木益深秀梯苔下絕巘坐石看飛溜陰
靈多窟宅欲往不敢又

興移初出山繫纜長汀樹夜來雪已深溪風水難度猶
疑鐘磬音遙遙白雲處

可憐行

紅顏白面可憐子杖藜飢走荒山裏翠眉新婦雪色兒
掩袖嬌啼瘦如鬼道傍朱門照霜戟腸斷汝翁呼不起
金魚象笏供撈捕紈袴終然愁餓死春風秋月哀思多
嗟汝少年奈老何

崑崙歌寄吾丘子行

翠鸞啼雲天四垂花龍雙雙神姥歸金仙憶君淚如水
昌陽落花青蘂蘂曾城珠闕揚素氛開明眈眈環九門
羲和走馬不待人鯨魚吸海海生塵若有人兮悵脩阻

紫玉參差老鳳語笑揮如意教雲舞雲間鶴雛生兩羽
歸來歸來勿蹉跎秋風吹折玕琪柯

金華山贈同遊者三十韻

杖藜初出城西門萬株紅葉如雲屯芙蓉峰前問行路
宛宛一線隨潺湲水聲漸遠山漸近弱蘿纖葛手所捫
須臾橫側變峰嶺高岸忽復為平原細泉瀏瀏竹竿直
石樹駢立疑同根剝金敗碧逢廢剎猶以第一名其軒
天明獨去弔遺迹玉女委蛻空丘墻樓居西起望明滅

石扉呀若山之樊罅幽穴險徑沮洳膝行匍匐不得奔
割觀崖广架寥泝雙龍遶雷蟠蜿蜿紛綸怪狀滿巖腹
熊虎踞伏鸞鳳騫其餘瑣細無不有形求象索難具言
前趨林麓却下縋俯矚九地窮涯垠青枝翠羽不復辨
但聽風水聲喧喧高燒松炬度其背珠箔忽隨華燈繁
聳身上出指絕頂碧桐高下彌山園遙穿蓬艾躡雲雨
險艱從此不易論秋毫細路莫容足下瞰不測傍無藩
怪藤如鈎草如劒舉首仰歎愁攀援山翁顧之笑引臂

前牽後接猴與猿
馳坑跨谷欹側過
背汗喘息逾魚燔
陰沈古洞悶星日
雖有寒暑無朝昏
却行左轉復深入
愈覺慄慄搖心魂
珠纓縹緲現滿月
稽首大士天人尊
拂衣逕逐飛鳥下
青山出沒波濤翻
或云漢人隱身處
彷彿肩背餘苔痕
蛇蟠磬折又數里
龕巖十丈開墉垣
夜歸草堂殿突兀
坐看雲月吐復吞
怡然攜手盡文士
頗覺筆下來源源
名山石室如可託
幸子歲晏來無諼

題李坦之詩卷

神仙中人世莫識政以文章為戲劇李生也復可憐人
手種蟠桃待春色山空歲寒誰念汝青楓墮影霜露白
遠遊賦成一朝去翠蓋雲旗莫何適蓬萊烟霧秋冥冥
鄧君白鹿無消息袖中驪珠三百顆夜深勿近蛟龍宅
金華之山青矗天山人看山忘歲年黃精芝草幸可食
安得與子巢其間石牀醉聽松風眠無為長歌怨如哭
使汝惻愴凋朱顏

茗溪風雨中章德茂同泛

黑風翻江白雨傾
檣欹柁側斷人行
此時惟我與章子
孤舟蕩漾烟波裏
蒹葭蒼蒼楊柳黃
浩歌擊舷興彌長
翩然一葉恣掀舞
青山白塔頻低昂
朝過城南莫城北
舟人問我將誰適
章子掉頭作吳語
秋水夜來深幾許
忽看大字標竹林
寺門對水仍陰陰
敲門見竹不見人
竹間翠石何蕭森
迴舟少林雨如注
四顧冥茫但煙霧
魚驚龍躍吾不知
披蓑却入菰蒲去
岸傍羣兒拍手呼
笑言狂客世所無
嗚呼古人今則無
後來視我知何如

為君留此有聲畫題作扁舟烟雨圖

陽山昱上人訪予吳門寓舍求為湘竹詩予辭
以未見竹上人不遠六十里自山中舁其竹而
來好有如此者欣然為賦長句

道人來自陽山麓手攜舊種千竿竹小栽方斛不盈尺
中有瀟湘江一曲未信天工能爾奇不知地脈從誰縮
晴窗脩脩散烟霧眼底森然立羣玉豈期我乃累此君
蒙犯風埃走塵俗故山方遠重愁絕新句未成慚迫促

黃岡之產大中椽政用材美剗其腹願言保此終天年
歲莫山中伴幽獨

杭州送兒姪歸里

空江月滿潮聲怒二兒勇踏潮頭去故園天末渺予懷
夢中識汝歸時路起向江樓遙望汝江上青楓正霜露
涼風颯颯吹汝急櫓搖背指龍山渡翩然一葉舞中流
嗟汝童心得無懼自我西游歷三紀舉目交朋半新故
下車相揖何紛紛白頭朝士猶徒步玄都觀裏舊桃花

見我重来能幾度
緬思疇昔仍念汝
徙倚闌干日將暮
前潮將斷後潮續
層波複浪無重數
魚龍出沒相後先
疾雷槌山雨如注
隔岸峰巒空復多
沙際冥茫但煙霧
計程知汝已登陸
息肩弛擔今何處
明朝過我三釜山
能勿徘徊起哀慕
近聞旱魃肆為虐
殺吾手植千株樹
且須為我語比鄰
莫遣牛羊上丘墓

番禺周節士歌

周君生長番禺君里長
身俛俛鬚仍美
師張先生業孔氏

夏螢冬雪頻繼晷先生愛君不飢餓君謂先生我知己
遭時戰伐多瘡痍賊衆乘之作姦宄郡檄先生俾一洗
先生慷慨為之起曰彼蚩蚩聚蜂蟻兇渠本我家奴爾
我將笞之用折箠披其角毛脫距胷奴挾兵來速如鬼
反噬其主先生死先生諸子俱幼穉周君聞之失箸匕
曰古復讎蓋有禮師長之讎視兄弟我今必也書於士
走告郡府伏以俟府公義之弗敢止授以及斨與弧矢
或云彼衆我無幾盍募援兵為表裏君奮不顧行益駛

賈勇直前無與比賊窮擲金計何詭得金失賊墮其餌
亟取貪夫尸諸市士氣復振賊乃靡追奔逐北劇賊壘
迅雷不及掩其耳一柵既覆衆柵毀生致賊奴泊妻子
刳其心肺獻俎几告於先生辭疊疊凱旋公庭旗旖旎
散遣部伍歸耘耔天戈耀日方南指郡將效死弗拜跪
周君堂堂衆所恃人咸謂君今可仕細書降表僅尺紙
大哉公侯小刺史君言我本不獲已出為吾師刷讎恥
罪人已得賊已弭東邨西落無荆杞不義富貴寧飲水

公母多談且休矣閉門高卧肉生髀白駒空谷餘四紀
歿葬金潭有廟祀鄉人歲時擊羊豕子暉來與胄子齒
踵門涕泣言如此嗟君壯節甚奇偉播茲歌詩侑哀誄

題醉歌圖

翰林主人天上来布颿不為鱸魚開江湖渺渺天一色
朝光莫靄相徘徊昔賢心賞餘勝處但有水竹無亭臺
碑材久已沒荆棘屐齒不復留莓苔後來視今猶視昔
今我不樂何為哉大官馬湏遠莫致鄰翁綠蟻浮新醅

欣然一飲便終夕，鼻端氣息如雲雷。是間別有一天地，不知何處為蓬萊。迴觀方內海，一粟醯雞塵甕何喧豗。黃冠祕監太狂態，騎鯨供奉非仙才。揮毫政要真學士，鋒車流水行相催。瑤池曲宴多雨露，歸歟酌彼黃金壘。寄方韶父先生

牢落江南賦知音，寄渺茫鹿麋行處有芝草。夢中香遙興滄溟，闊悲歌白髮長平生。今古淚滴破綠蘿裳。

雨二首

兀坐九十日雨聲殊未收
花時翻益睡茅屋不禁愁
生事吾何望春寒晚故留
江波青滿眼萬里付雙鷗
泥潦今如此出門知路難
蓬蒿春自長桃李夢曾看
未覺龍公倦誰憐燕子寒
青燈耿蕭瑟千載入憂端

寄友人

憐君山水意局促守柴扉
故里悲秋草涼風滿褐衣
滄洲斜日晚白社幾人歸
寂莫分遙念天寒木葉稀

秋懷二首

天末雲猶去山中歲欲徂周流吾道在歎息古人無野
鵲疑秋樹新駒怯暝途蒼茫念同志微薄忝為儒

稍稍秋河落娟娟宿露微天清江不息野迴樹相依回
首狂歌數驚心昨夢非流螢無思極巧入絳帷飛

憑軒

信有儒冠誤憑軒意欲迷山深風雨惡天闊羽毛低他
日開炎瘴連城送鼓鼙荷戈吾媿爾未敢歎塗泥

風雨

風雨忽如此閉門方晝眠故應為計拙可復要人憐燈
火羌邨路桑麻杜曲田悠悠今視昔把卷一茫然

社日重過方子踐

東風吹客衣長憶見君時一別驚雲散重來與燕期春
深今雨夕花老去年枝莫待空山裏青燈有所思

聞子踐卧疾

吾子仍多病何人共解顏水聲和藥臼春色閉松關積
雨連三月懷人劇萬山同遊沉零落浩蕩可追攀

過謝臯羽墓

識子今無日風流可復尋
山林餘楚製弟子解閩音
滄海他年夢青天後夜心
平生匣中劒零落遂如今

八詠樓

懷古荒碑在登樓晚望賒
秋陰垂野薄江勢抱城斜
天地悲游子冰霜感歲華
紅塵吹裋褐歸興及清笳

明月樓

遺堞何年有飛甍壓上頭
鼓鼙分上幕香火望靈湫
曲

岸舟如失遙沙樹欲浮登臨且吾土未敢恨淹留

杭州寄子踐

一作壽甫

樽酒何人共春光著處同乾坤容野馬歲月失飛鴻俗
眼能無白風花故自紅向來常處士早已負諸公

次韻答子踐

不謂飛霞佩珊然寂莫濱相看今雨夕漸近長年人往
事驚如夢何峰擬卜鄰平生千里駕還往得辭頻

陪仇仁父先生登石頭城

談笑逢諸老登臨失故亭
薄遊成汗漫高步覺竛竮
峽水通吳白淮山入楚青
平生一杯酒及此慰飄零

抱琴

三尺枯桐樹相隨年歲深
此行端有意何處託知音
隱隱青山夜寥寥太古心
空攜水仙曲更向海中岑

次韻答陳君采兼簡一二同志二首

默守知存道清言不廢儒
身方同木石名已在江湖
此士須前席何人屬後車
唯應耕釣者縹緲識霞裾

尚想南歸始簪花出禁闈塵沙迷故步桃李借餘輝有
日酬天造終身返布衣風流成二老巾屨儻相依

送陳養直歸四明

迢迢浙河水同渡不同歸執袂方成別驚帆已若飛野
橋行處酒風雪去時衣瞻望嗟何及天長鴻雁微

送趙宗吉御史

憶共趨龍禁驚聞正豸冠汗顏居館下矯首望雲端去
路黃河直飛霜白日寒仙舟如可託歸理釣魚竿

初至海寧二首

地至東南盡城孤邑屢遷行山雲作路累石海為田
蜃炭邨邨白梭林樹樹圓桃源名更美何處有神仙
縹緲蛟龍宅風雷隔杳冥人家多面水島嶼若浮萍
煮海鹽煙黑淘沙鐵氣腥停驂方問俗漁唱起前汀

過永康桃巖

立石平如削飛雲近可梯莫窮千古勝但惜衆山低
靈草經春長珍禽隔樹啼人言舊朝士感事有留題

九日登石頭城

背郭鶯塵遠高秋川岳清幽懷初曠蕩陳迹故縱橫遙
望龍盤舊長憐蟻穴爭紺園隨處闢粉堞向來傾發草
窺簪井看碑驗故塋門開蒼耳路亭愛翠微名遠樹淮
南出滄江鳥外明人烟川浩渺風物歲崢嶸吹帽仍佳
節傳觴但老兵愚生雜鼃黽浪走媿璜珩去去帆檣盡
蕭蕭蘆葦鳴登高未成賦覽古獨含情政復哀王粲何
堪厭襍衡散廬滄海曲目斷白雲生

癸酉四月同子長至赤松子長先去遂獨宿智
者之草堂已而子長與正傳俱來同出靈源詣
鹿田遊三洞遠過山橋至瀟岳謁故中書舍人
潘公之墓復回智者而別

昔共張公子翩翩訪赤松重來經兩紀獨去宿孤峰古
木蒼陂映禪房側徑通夕陰千嶂黑人靜一燈紅幸及
軒車會寧辭杖履從相看如夢寐健走媿兒童春盡山
仍好林深澗忽窮天低時墮雨寺遠但聞鐘弔古田無

鹿探奇洞有龍幽尋穿窅窳高步踏玲瓏靈草多成藥
疎簞不作叢嵐光凝曖曖野色在空濛下瞰疑無底言
旋復向東巖阿棲斷礎烟外落飛淙細路緣苔磴危橋
跨石礧泉依山曲曲雲與樹重重巨剎連名岳穹垣護
畝宮倚闌斜日下入室老僧逢零落螭頭黑荒涼馬鬣
封不才待薄祿終古望遺風弛檐雲闕裏傳觴雪峽中
追隨尋道侶述作付文雄急景真流電浮生尚轉蓬後
期觀歲晏來往意憧憧

同劉遂初修撰周伯溫編修任大瞻經歷王繼
志架閣西山行香次遂初韻

仙馭賓天久衣冠出此游祇園金地古汾水白雲秋謁
拜陪諸彥躋攀展寸眸始知山水窟近在帝王州深岫
藏青靄平蕪映綠疇層臺臨太液環海象瀛洲粵自遺
弓劒無從望駐旒明庭虛次舍綵纜舊維舟陞戟盈千
列靈輿副九旂祠官偵伺謹中使往來稠備禮兼今昔
求神徧顯幽琅函開貝葉玉瓚薦黃流彤嚮人天合輝

光日月倂遙看陳羽衛疑是問龍樓花雨繽紛落香煙
泱泱浮重闕羅虎兕簇仗擁螭蚪去去簫聲遠微微扇
影收清都成夢境塵劫等浮漚歸徑緣湖尾殘陽挂樹
頭舉杯相慰藉分席暫淹留物色迂行轡風寒襲敝裘
迴瞻天路永坐感歲時周戀闕慚衰朽非材墮謬悠詞
休富鴻藻珍贈若為酬

試院同諸公為主試官作

右轄升庸日秋闈獻藝初端居煩坐鎮妙簡備賢書憶

昔興文運惟天啓聖謨教條行九有學業出三餘儒術
俄中否詞場遂久虛綸言何噩噩髦士共于于吐握承
謙德飛揚感壯圖至公留藻鑑成物待洪鑪肅穆華星
聚涵容化日舒誰歟隨計吏行矣聽傳臚橘柚天庭貢
參苓相府儲鋪張須鉅筆衰朽媿荒疎

鳳凰山

滄海桑田事渺茫行逢遺老色淒涼為言故國游麋鹿
漫指空山號鳳凰春盡綠莎迷輦道雨多蒼蘚上宮牆

遙知汴水東流畔更有平蕪與夕陽

開元宮

誰使藏舟一夕移紅樓翠幕未全非曾聞帝子乘鸞去
疑有仙人化鶴歸烟逕月明瑤草歇石壇露冷碧桃稀
赤欄橋畔多時立閒看楊花作雪飛

早起

漠漠晴檐散薄雲獨搔短髮立清晨春風入樹無行迹
曉月窺簾欲近人旋覺新吟隨夢寐不知清露溼衣巾

何人正踏長安陌想見看花拂面塵

獨立

一作遣興

數盡飛花一愴然壯心迢遞夕雲邊十年人事空流水
二月風光已杜鵑過眼青春寧復得汙人黃土絕堪憐
故園尚有平生約可使蒼苔到石田

即事

南陌東阡草色齊愔愔門巷客來稀受風燕子輕相逐
著雨楊花溼更飛綠樹無言春又盡紅塵如霧手頻揮

浮生莽莽吾何計獨立看雲竟落暉

予與劉君師魯為文字交十有四年而固未嘗
相識也茲過武林偶遂良覲有喜而賦

邂逅神交十載餘青楓落月幾愁予何言此日同傾蓋
勝讀平生未見書天上玉堂容可到山中金匱得長虛
故多餘事宜商略可待秋風怨索居

次韻山南先生遣興

稍覺春風入翦裁更無魂夢到塵埃苔枝自送黃昏影

寶篆頻銷白晝灰
世態漸應隨日別
老懷可復向人開
擁鑪坐聽蕭蕭雪
載酒攜琴也莫來

寄朱仲山

異縣關心朔鴈飛
酒燈暴雨計頻違
寄書全覺嵇康懶
入夢多疑李白非
黃葉閉門方寂寂
碧雲回首故依依
相逢賴有梅花約
試蹋東風走翠微

夏日漫書

枕上初殘柏子香
鳥聲簾外已斜陽
碧山過雨晴逾好

綠樹無風晚自涼
芳歲背人成荏苒
好詩和夢落蒼茫
求羊何不來三徑
門掩殘書滿石牀

逢葉伯幾

水煙沙雨送歸航
楓葉蘆花已十霜
瑤曲天風春夢遠
墨池秋草故遊荒
碧峰又是新迴鴈
白石依然舊化羊
一笑相逢却成別
莫雲千里思茫茫

宿賈氏山房

暝色蒼茫赴遠岑
獨追燈火下荒潯
寒沙細水通幽徑

脩竹高楠走翠陰
草草悲歡中夜語
悠悠醉醒百年心
石霜煙月寒無寐
坐聽疎鐘出二林

過烏傷墓

丹青像設始何年
翁仲遺墟自古傳
時有北人來下馬
不知秦樹幾啼鵑
牧童解指看碑路
野衲分耕祭墓田
回首長安西日外
茂陵松柏正蒼煙

金陵天津橋

一作金陵懷古

五雲零落渺天涯
陳迹蒼茫日自斜
畫角已吹邊塞曲

紅藍新長內園花可憐遺老埋黃壤曾倚春風望翠華
好在北山猿與鶴依然同住舊煙霞

送人歸豫章

已覺棲遲懶曳裾可能為我強躊躇一帆秋色紅塵外
千里江關白鴈初建業水清誰共飲潯陽潮斷定無書
黃金未盡朱顏在莫種桃花學隱居

送韶父先生遊京口

不到南徐三十春好將夢寐弔遺民也知往事如流水

祇想重來是後身
棹響官河風色暮
雲離野服鬢毛新
舊游偶失扶桑路
煩向滄江一問津

寄張如心

謬羨侏儒飽一囊
舊遊搔首獨淒涼
連天斷雁初沈日
匝地寒花欲有霜
聞道為郎須白髮
未殊高枕待黃粱
紅顏好在張公子
坐聽松風春晝長

余山

春雲牢落雁無聲
沙岸參差石有稜
雙屐漫窮芳草徑

一龕長媿白頭僧
晴濤閃閃翻孤日
山木昏昏卷翠藤
後夜清風滿遙念
夢遊空指上方燈

龍潭山

二月清江照眼明
避風舟楫滿迴汀
斷雲挾雨時時黑
密葉藏花樹樹青
習隱未成陶令賦
行歌聊共屈原醒
碧潭光景無消息
坐看魚兒點翠萍

次韻方子踐觀潮

潮生潮落有時休
朝莫吳兒幾白頭
被髮祇誇迎駭浪

側身寧解障奔流江吹碧瓦人聲曉雲閃朱旗海氣秋
後夜月明天在水有誰能此試登樓

次韻答蔣春卿

不謂紅塵拂面時軒然談笑一舒眉晴風石鼎浮花乳
夜雨春盤冷碧絲握手遽成三宿戀論心那覺十年遲
酒船漁網歸無計未必山前白鷺知

重遊毗山

十載重來思惘然勝遊邂逅一開顏高林有色烟雲淨

卷三十一
曲徑無香草樹間漫遣金樽催白日絕憐紅粉浣青山
南朝舊迹今誰記腸斷風流不可攀

花信

已覺尋芳去較遲千林紅紫總紛披幾經夜雨能無恙
試問春風竟不知斜日游蜂應有夢野亭立馬已多時
殷勤却是江南客曾擘冰霜寄一枝

北山歸路呈古心師兼簡方外諸友

尋幽偶向靈源宿却過雲關望翠微初日映空千樹立

驚風繞澗百泉飛
舊題歲月人頻異
乍別烟霞路易非
幸有潘郎遺事在
何時一鉢去如歸

陳山晚泊

一柱孤撐杳靄間
人言此是客星山
風流百世今誰嗣
應詔諸生故未還
荒冢草深迂石路
高齋月滿闕松關
窮年漫跡滄江上
及此維舟獨厚顏

湖心寺夜坐

蕭蕭涼月滿池臺
水檻風櫺四面開
一炷殘燈何熠煜

半檐衰柳故崔嵬
謬持微祿知無補
未謝餘緣得重來
塵土馬蹄何日事
可容良夜廢銜杯

題金明宴遊圖

危樓縹緲碧波中
曲檻方櫺面面通
雲氣傍花如欲雨
柳絲垂地不驚風
千年華表人非是
九奏鈞天樂未終
更有殘山并賸水
煩君回首六橋東

上巖寺訪一公

曉色微茫尚帶星
脩蹊輦确斷人行
獨支瘦竹身猶健

高入重雲地忽平落月正當山缺處細泉頻作雨來聲
上方燈火青林曲隱隱疎鐘一再鳴

題雪竇妙高臺

偶為清遊宿梵宮凌晨試上最高峰水翻雪色寒猶落
雲掩丹光遠更重舊有一僧能跨虎近聞三洞盡藏龍
下方車馬應難到烟際惟聽日暮鐘

題觀海圖

昔年解纜峯江上初日團團水底紅鼉吼忽搖千尺浪

鷁飛仍挾半帆風遙看島嶼如星散祗謂神仙有路通
及此棲身萬人海舊遊却在畫圖中

送葉仲輿巡檢

重著儒冠望帝鄉翩然一舸犯晨霜秋來髣髴依前黑
日射河流徹底黃此去乘槎須有路可容執戟更為郎
絲綸閣下多知己握手應分滿袖香

送趙繼清潮州推官

相國南遷有故居理官高選出新除承恩特與金魚袋

訪舊爭迎駟馬車
春入園扉庭草暗
天低驛路嶺梅疎
鳳池不隔同年面
歸及梅花雁影初

送龍南歐陽縣尹

絲綸閣下半同袍
獨上南船去莫招
出宰不嫌官俸薄
過家未覺驛程遙
長溪白石晴雷轉
深洞黃茅毒霧消
想見行春有佳句
坐令遠俗變風謠

贈黃資深

涼風蕭蕭吹敝裘
三年小作周南留
相逢傾蓋盡青眼

肯抱遺經空白頭
捧檄定知毛義喜
著書非有虞卿愁
春秋決事待公等
莫戀寒氈成久游

送陳季和

高齋燈火正蕭條
忽溯天風上泐寥
共喜彈冠如貢禹
豈期投筆學班超
時清桴鼓元無用
歲晚弓旌儻見招
雪後江南春水活
重來莫厭驛程遙

送張良卿學士之淮南

坐厭流塵拂面紅
行攜涼月下青空
三千里外揚州鶴

四十年前御史驄先廟鐵衣猶挂壁兒郎玉帳已生風
貞元朝士今無幾歸及花時一笑同

題莫氏山莊圖

旋移小隱傍南峰遠有咸平處士風山態近人猶偃蹇
湖光無雨亦空濛行春杖屨時時到臨水軒窗面面通
別作新亭供戲劇青帘遙曳杏花中

予與江陰何鼎叔鉉別三十六年乃相見於錢
塘感舊述情漫成四韻

月寒霜樹久相依春去風花各自飛
遠信已隨潮水斷故交渾若曉星稀
綈袍可戀知誰在青鏡頻看歎昨非
正欲從君共傾倒莫言興盡便須歸

送內史府孫知事還京

春風朱邸雪初消野宿貔貅靜不驕
綠水芙蓉分上幕青雲騶裊度輕輶
龍庭會祭包茅貢豹尾宸居佩玉朝
下土微臣今老矣淹留敢望小山招

感舊

華屋山丘不可期
峴峰依舊綠參差
空懷下榻延徐孺
無復乘舟訪戴逵
日莫更聞鄰舍笛
歲寒賴有角弓詩
舊遊寂莫成今古
冷石秋花處處悲

答友人

芝掌峰前一盃酒
別離歲晚遞相望
野梅如雪遙入眼
曉鴈連天寒叫霜
閉門窮巷燈火冷
回首蒼山雲樹長
幾時抱被却同宿
媿爾詩筒遠送將

山中偶題

古苔隱石色寒花明藥叢有時白澗雨終日青松風

夜坐

涼風動千里孤坐思滄洲白露洗明月青天此夜秋

金陵客中送友人歸里

青陽河畔杜鵑啼歸路如烟一作弦定不迷應到故山叢

桂裏笑人騎馬聽朝雞

有感二首

橘柚青黃照眼垂秋風籬落自紛披頗聞玉食登蠻果

不獨涪州有荔枝

漢室需材拔隱淪
販繒屠狗各求伸
可憐風雪南山下
別有當年射虎人

葉審言張子長同遊北山智者寺既歸復與子
長至赤松由小桃源登煉子山謁二皇君祠回
宿寶積觀賦絕句十首

天風吹我度崢嶸
春著千巒翡翠青
紫陌紅塵寧有此
十年空負北山靈

芙蓉峰下南朝寺水秀山明兩絕奇更向水窮山盡處
一菴高貯碧雲師

却問仙山去幾程白雲如簇近相迎直須不脫登山屐
行盡松聲與水聲

山中今是太平民尚與人間隔幾塵流水桃花三百曲
莫教重悞武陵人

偶看飛花逐水紅不知身過亂雲東回頭旋覺峰巒別
惟有青天面面同

雙鶴沖天歲月多至今香火壓嵯峨劉郎不是無兄弟
奈此丹雞白犬何

坐愛春泉響翠微玉花吹溼薜蘿衣何人為擘冰壺破
共看青天白練飛

削立城心雙白塔幾疑日月費撐支一朝頓在闌干底
始悟從來見處卑

遙憶仙華鶴髮翁清泉白石滿奇胷若為此日千峰頂
更試平生九節筇

一宿山中竟莫留可能長伴赤松遊
殷勤好去張公子
休愛人間萬戶侯

次韻章兄雨中

春盡餘寒去却回江天五月未聞雷
南風祇在浮雲外
彈折朱絃喚不來

松江舟中偶書

移舟夜泊華亭縣却聽吳歌思渺然
最憶澱山湖北寺
白雲堆裏看青天

青山白雲圖

十年失脚走紅

一作京

塵忘却山中有

一作青山與

白雲忽見

畫圖疑是夢冷

一作落

花涼葉思紛紛

桃竹畫眉圖

說盡春愁貌不成
翠深紅遠若為情
江南有客頭空白
腸斷東風百轉聲

追和景傳新店客舍壁間韻

我夢方酣子遽醒
絕絃可復要人聽
梨花寒食東風惡

淚盡重山宿草青

灤陽邢君隱於藥製芍藥芽代茗飲號曰瓊芽

先朝嘗以進御云錄二

芳苗簇簇徧山阿玉蕾珠芽未足多千載茶經有遺恨
吳儂元不過灤河

春風北苑鬪時新萬里函封效貢珍羨爾託根天尺五
不勞飛騎走紅塵

次韻虞學士上京道中

欲去仍為一日留
玉堂中夜有詞頭
歸鞍曉逐南飛雁
猶及西山半夜秋

水仙圖

脩脩翠羽映鳴璫
誰遣乘風過我傍
歲晏高堂空四壁
一簾烟雨夢瀟湘

山水圖

老樹無陰石有稜
亂山高下白雲層
夢中猶識江南路
惟恨舟人喚不應

海月圖

憶曾夜叩潮音洞海闊天高月正中
坐對畫圖如夢寐
六街塵土晝濛濛

瑤池春宴圖

西飛青雀幾時還
貝闕琳宮縹緲間
筆底春風殊未老
蟠桃積核已如山

東陽縣西道中

柿葉成陰綠滿邨
桐花覆地草連雲
百年舊事無人記

猶指前朝御史墳

寒食舟中

東風溪水碧
漣漣溪上青
蘿獨繫船
正是落花寒食夜
水烟沙月又鳴鶻

哭御史王公二首

掉頭東下苦
息息徑挾羣仙入
貝宮眼底珊瑚高
百尺釣竿吹折一絲風

膠液中流事可歎
海雲飛雨失青天
陸郎地下驚相見

應訝來遲二十年

陶學士驛舍圖

一笑相逢亦偶然
浪將恩怨向人傳
無端更被丹青汙
狼籍春風數百年

宣和畫木石

石邊古木尚青枝
地老天荒石不知
故國小臣誰在者
蒼梧落照不成悲

題高公畫竹石

木葉蕭蕭半欲空
竹竿裊裊不成叢
絕憐意匠經營處
都在風烟慘淡中

題金德原所藏元暉小景

牀頭書畫正縱橫
忽值今朝醉眼醒
起向米家船上看
雲山元是舊時青

四皓圍碁圖

當局沈吟只漫勞
區區勝敗直秋毫
顛羸蹶項非君事
賴有安劉末著高

集淵明句題李中甫員外稼亭

東方有一士客養千金軀東帶聽鳴雞出則陪文輿代
耕本非望暫與田園疎田園日夢想投冠旋舊墟興言
在茲春新疇復應畬田父有好懷過門更相呼披草共
來往履歷周故居悠悠待秋稼時還讀我書雖未量歲
功棲遲固多娛此事真復樂此語真不虛餞送傾皇朝
歸子念前途前途當幾許直至東海隅古時功名士事
事在中都遙遙沮溺心君情定何如

集淵明句題胡主簿嘉樹軒

孟夏草木長霜露憔悴之藹藹堂前林冬夏常如茲嚴
霜九月中卓然見高枝如何舍此去白日掩荆扉深谷
久應蕪此蔭獨不衰黽勉六九年懷此貞秀姿常恐負
此懷未足為高棲及時當勉勵慷慨思南歸親戚共一
處日夕歡相持披榛步荒墟登高賦新詩坐止高蔭下
一觴聊可揮從今至歲寒縱心復何疑

永嘉王君自製挽歌詞蓋能安死生而未忘情

乎死生者也集淵明句以釋之

自古皆有沒我今始知之居常待其盡逝將不復疑人
生無根蒂去來何依依既來孰不去奄去靡歸期復得
返自然人間良可辭何事空立言念此懷悲悽日醉或
能忘一觴聊可揮且極今朝樂千載非所知

鍾山

以下從風雅補入

平陸漫千里茲山乃穹然猶憐布金地未即辭喧闐巖
液散珠琲春岡走蜿蜒稍欣陟幽邃登頓衣屢褰路細

石嵒嵒崖深竹娟娟洞扉剗開敞峻峰指中天冥探歷
嶽峯垂蘿弱容牽碧潭隱光怪華雨漂崇筵下睨飛鳥
輩茫茫但蒼煙渺然玄圃期淒涼雲嶠篇休駕將未能
惆悵春風前

敬亭山

昔窺敬亭作今陟裴公寺徵素非始遊賞勝資深詣脩
脩緣水木宛宛交蹊術綠縟澗草豐幽颺松飈駛微鐘
響沓嶂高閣浮花氣聿薰梅檀妙豈愛岑壑媚憑生實

內惕即事多冥契
息陰睠枌櫨
擧芳懷
芝桂海嶽期
屢遷石林路
深閤經營乖
道要迫窄餘
物累稽首調
御尊尚飲無生惠

贈別葉審言

昔人稱好士
乃有黃金臺
黃金亦何物
顧用驕賢材
葉生被短褐
志力何雄哉
北走叫閭闔
紅雲指崔嵬
終焉無苟售
自保同嬰孩
車服非吾榮
黃金直浮埃
十年今何官
茅屋歌蒼苔
豈無琅玕樹
鳳飛故低徊
一朝脫身

去歛觀雲路開葉君善自愛往矣無嫌猜迷邦古所誚
豈弟貴不回願言吐奇胷落落排風雷尚念窮賤者衡
門守蒿萊

晉卞將軍墓

江左失其御強臣布中區歡娛一以乖狂獠無趨趨黃
屋播草野彤庭交劒及事樞始誰秉捧首如奔狐偉此
百世士死與二子俱孤衷耿未沫足以孚豚魚義旗果
東指白日開天衢孰最撥亂功之人或其徒伊昔大雅

廢清言鄙文儒禾黍已橫委衣冠尚舒徐屹然見砥柱
獨障狂瀾趨大節固如此捐生乃其餘青簡煥遺烈蒼
榛閔幽墟日夕悲吹多天高年運徂世方用骭骸猶將
媿玄虛江濤渺在望雪涕空漣如

贈俞觀光

寒窗讀書吻正悲坐聞剝啄走啓扉衝風踏凍至者誰
俞子訪我由剡谿相逢把臂話移時婦人驚笑羣兒癡
俗物病我不可醫眼明求此珊瑚枝朝來贈我天馬詩

忽然掉頭去莫羈鼻頭氣息干虹霓詎能折腰向小兒
文章技癢聊娛嬉策勲聖處今毋遲繫我愛子莫助之
臨岐躑躅徒嗟咨

五月廿日

不擬夫容佩終焉挂寂寥百年多事始千里一身遙巢
燕驚華屋鵲鷹望碧霄蒼蒼叢桂樹愁絕小山招

含香道中


殘日亭猶遠輕風帽易斜稻畦低沒鶴草徑曲行蛇經

世知無策謀生會有涯
殷勤理黃菊留眼待秋花

客夜偶書

歷歷疎螢度眼明
獨搯高枕數殘更
薄遊已倦新彈鋏
猶餘未棄檠
一雨送晴初月色
百蟲專夜故秋聲
三十非年少已覺
人間有後生

元詩選初集卷三十一



總校官候補中書臣吳紹潔
校對官編修臣馬啟泰
謄錄監生臣孫大森